


KOMUNIKADU IMPRENSA : PREZIDENTE REPÚBLIKA PROMULGA TIHA ONA LEI ELEITORÁL BA PARLAMENTU NASIONÁL ATU NUNE'E ELEISAUN PARLAMENTÁR BELE LA'O HO HAKMATEK, MASKI SEI IHA DÚVIDAS KONA-BA NORMA BALUN

 presidenciarepublica.tl/komunikadu-imprensa-prezidente-republika-promulga-tiha-ona-lei-eleitoral-ba-parlamentu-nasional-atu-nunee-eleisaun-parlamentar-bele-lao-ho-hakmatek-maski-sei-ih-duvidas-kona-ba-norma-balun/

5/5/2017

Sua Exelénsia Prezidente Repúblika, Taur Matan Ruak ohin promulga ona alterasaun ba Lei Eleitoral ba Parlamentu Nasionál atu nune'e eleisaun parlamentár bele la'o ho hakmatek, maski nia sei iha nafatin dúvidas kona-ba solusaun balun ne'ebé mak temi iha lei refere.

Iha nia mensajen ba Parlamentu Nasionál hodi akompaña promulgasaun, Prezidente Repúblika dehan katak nia la konkorda ho opsauun atu hakotu mandatu deputadu sira-nian ne'ebé la halo tuir regras dixiplina partidária, no di'ak liu promove Demokrasia nia lala'ok saudavel hodi asegura kontraditóriu nu'udar meius ida atu hetan solusaun hirak ne'ebé di'ak liu ba ita-nia destinu kolektivu. Nune'e mós, Prezidente fiar katak previzaun ba tipu krime foun ida ne'ebé bolu dehan “uza sala sigla ka símbolu” bele limita kampaña eleitoral sira-nia kualidade. Ikusmai, Prezidente Repúblika afirma dala ida tan katak nia prefere solusaun ida ne'ebé bele hametin CNE nia poder regulamentár sira hodi defende ninia independénsia iha supervizaun ba aktu eleitoral sira.

Molok atu hakotu, Prezidente Repúblika, Taur Matan Ruak refere katak asegura instituisaun demokrátika sira-nia lala'ok regulár maka Prezidente Repúblika nia obrigasaun dahuluk iha tempu dame nian no espera katak eleisaun parlamentár oinmai sei la'o ho hakmatek, livre no justu hodi bele sai festa Demokrasia ida tan.

Palasiu Prezidente Nicolau Lobato, 5 Maiu 2017

- Copyright 2014 | Presidência da República de Timor-Leste